

Pemuda PAS mahu Sinar Harian mohon maaf
MalaysiaKini.com
April 30, 2012
By Koh Jun Lin

Dewan Pemuda PAS menuntut akhbar Sinar Harian meminta maaf dan menarik balik laporan yang mendakwa anggota Unit Amal menyerbu ke arah pihak polis semasa perhimpunan di luar Kuala Lumpur City Centre, Sabtu lalu.

Ketua pergerakan itu Nasrudin Hassan yang menafikan perkara tersebut berkata dakwaan itu "tidak munasabah."

"Berdasarkan rekod Unit Amal, ia tidak masuk akal dan tidak munasabah untuk mempercayai bahawa mereka akan menggunakan kekerasan dan menyerbu pihak polis," katanya.

Jelasnya, pada kejadian di persimpangan Jalan Ampang dan Jalan P Ramlee itu, beratus-ratus pegawai polis terlebih dahulu membentuk barisan pertahanan dengan 'mengunci' tangan mereka, kecuali di bahagian kanan pasukan berkenaan.

Nasrudin berkata, pihak polis juga telah membentuk barisan di persimpangan Jalan Yap Kwan Seng, Jalan Ampang dan Jalan P Ramlee.

Bagaimanapun, katanya, pihak polis yang berada di Jalan P Ramlee tidak membentuk benteng pertahanan. .

"Oleh itu, Unit Amal merasakan bahawa ini adalah ruang untuk melarikan diri dari kepungan polis dan peserta perhimpunan anti-Lynas juga dapat melepaskan diri dari kawasan tersebut tanpa bertempur dengan polis," kata Nasrudin pada sidang akhbar pagi ini.

Copyright © 1999-2012 Mkini Dotcom Sdn. Bhd
Source: <http://www.malaysiakini.com/news/196504>

